

Ursin Widmer candidescha per la suprastanza da Favugn

■ (rtr) **Ursin Widmer, il figl da la cussegliera federala Eveline Widmer-Schlumpf, vul vegnir pli activ en la politica e candidescha per la suprastanza da Favugn. El ha bunas schanzas cunquai ch'el è il sulet dals quatter novs candidats ch'è propi anc oriund da Favugn.** Quai saja era stà ina da las raschuns principalas daco ch'el saja insumma sa decidì da candidar per in sez en suprastanza. «Nus avain vis la glista cun ils quatter candidats ed avain constatà che nagin dad els è propi da Favugn», di *Ursin Widmer* (26) ch'è sper scolast da musica er anc dirigent, chantadur e musicist. «Quai na munta betg ch'els na vegnissan betg da far bain la lavur sco suprastant, anzi jau crai ch'els fissan tuts quatter adattads.» E tuttina, el saja creschì si a Favugn, vivia

er ussa qua e saja en sasez integrà fitg en la vita quotidiana da Favugn.

Sia mamma n'haja en mintga cas betg ditg ad el da candidar. Ella haja bain manegià che quai fissi insatge per el, dentant betg dapli. Dentant cunquai che ses bab è stà plirs onns en la suprastanza da Favugn ha el survegni ina buna impressiun co quai è d'esser en suprastanza ed è lasuenter stà ton pli motivà da candidar.

Malcontent cun ils resultats

La raschun principala daco ch'el è sa decidì da vegnir pli activ en la politica, haja dentant da far cun las votaziuns ed elecziuns. «Jau sun bleras giadas betg stà cuntent cun ils resultats da las votaziuns ed elecziuns ed era grazia a collegas sun jau vegnì a la conclusiun d'em-

pè tugnar trasora, empruvar da far insatge encunter. Sco ses geniturs è er Ursin Widmer commember da la Partida burgais-democratica (pbd). El na vesa quai dentant betg sco dischavantatg suenter las elecziuns naziunalas nua che la pbd ha pers vuschs. Insumma è el da l'avis che las partidas dal center ston a lunga vista fusiunar per furmar in ferm center. Ch'el ha ambiziuns da far carriera politica e suandar ils fastizs da la mamma *Eveline Widmer-Schlumpf* na sa el betg anc dir. Impurtant saja per el uss en emprima lingua dad esser pli activ politicamain e da candidar per la suprastanza da Favugn. Dentant lascha el sentir ch'el avess schon mustgas da candidar forsa ina giada per il cussegl grond.

Las elecziuns han gi lieu ier saira.